

Nesvakidašnja bajramska izložba starih eksponata u Bugojnu



Poznati bugojanski kolekcionar Dragan Mučibabić ponovo je oduševio svoje sugrađane, koji obilježavaju jedan od najvećih praznika u islamskoj tradiciji – Ramazanski bajram.

Na travnjaku ispred zgrade u kojoj stanuje priredio je izložbu jednog broja eksponata koji su, kako kaže, već decenijama u njegovom vlasništvu.

-Ovo je moj način da čestitam bajram komšijama, prijateljima i svima onima koji slave. Želio sam ukazati i na značaj očuvanja bh. tradicije i narodnih običaja kojih je, nažalost, sve manje – kazao je.

Smatra kako je to od neprocjenjive važnosti, jer "ljudi koji ne znaju čuvati kulturno-historijsku baštinu, gube vremenom svoj vlastiti identitet".

-Jedan od ciljeva je da svoju veliku ljubav prema eksponatima podijelim s onima koji vole starine. Kao i uvijek do sada, ljudi su uživali gledajući stare, davno zaboravljene predmete, koji su se koristili nekada u svakodnevnom životu žitelja ovih prostora – naglasio je.

Dodaje da je poseban interes prolaznika, koji su ovu zanimljivu izložbu, ipak, posmatrali s distance, izazvala lutka obučena u muslimansku narodnu nošnju, s fesom koji je bio ukrašen vrijednim dukatom.

-Sama vrijednost nakita na djevojci je oko 3,5 hiljade KM, a izuzetno vrijedni su i svi drugi eksponati koji su se našli u okviru ove moje mini izložbe, kao što su demirlija, đugumi, mlin, džezva... – kazao je ovaj Bugojanac.

Nada se da će uskoro biti u prilici da organizira ranije dogovorene izložbe koje je, zbog pandemije koronavirusa, bio prinuđen privremeno odgoditi. (Fena)

[Share on Facebook](#)

- [Tweet](#)

- [Follow us](#)

- [Share](#)

- [Share](#)

- [Share](#)

- [Share](#)

- [Share](#)

Date: 26-05-2020